

壬癸志稿十二

太倉錢寶琛伯瑜輯

同里

葉裕仁涵溪
季錫疇崧耘
趙兆熊耳山
畢庭杰雄伯

參校

人物

太倉州

流寓

元

楊維禎字廉夫會稽人嘗至太倉時殷伯堂為其孫奎
築滄江風月樓以招致四方名士樓甫成適維禎至置
酒高會奎即於席間執弟子禮焉

壬癸志稿

流寓

一

杭仁字仁甫上虞人徙居太倉好行義凡利濟人無吝
其子禮以孝稱女妙壽守節一門著行至元六年卒年
八十五有司表門復其家

鄭明德名元祐以字行遂昌人兒時脫右臂自稱尚左
生少穎異善詞賦咸淳諸老折節下之徙居姑蘇臺省
以潛德薦不就至正中薦本路儒學教授陞江浙提舉
卒嘗寓太倉書天妃宮廟碑筆法適美嘉靖間入祀遂

昌鄉賢

熊夢祥字自得江西人通羣書旁曉音律能作數體書
寫山水尤清古以秀才舉教官輒棄去放意詩酒游淮

浙間卜居太倉自號松雲道人與顧仲瑛爲忘年交今
草堂雅集傳其詩

余詮字士平江西豐城人後居太倉學識該博工詩文
至正間爲江浙儒學提舉

楊諱字履祥福建浦城人徙居太倉博學有才行與秦
玉袁華爲友晚作崑山州志楊維禎爲之序

文質字學古温州人徙居太倉有學行詞章奇放與楊
維禎夜行詠梅花燈詩立就爲世所稱年九十六

明

盧昭字伯融福建人徙居太倉淹貫經史工詩文洪武

壬癸志稿

流寓

二

初起揚州教授

孔宏幹字克勤先世由闕里徙温州宏幹於天順間客
太倉遂家焉爲人醕謹誠樸鄉里稱之

王舜國號桂宮江甯人萬厯間寓居城隍廟畫人物極
疏古性戇率嗜酒當索畫者踵接輿至則連幅應之否
則雖重購亦不得也後卒於州

邱集字子成嘉定人諸生精三禮尤熟濂洛關閩之書
值倭亂與寡姊各瘞金土中集爲倭所獲索其資祇出
已藏以應兄與兄之子逋賦法當遣戍集代輸得免晚
依妻族周氏居雙鳳里貧甚賴朋舊周問卒年八十

董其昌字玄宰華亭人未第時曾客太倉天啟間謝政歸復偕陳繼儒至州寓居王氏南園大書話雨二字於壁至今墨瀋如新

胡祖虞字叔羽歙縣人寓太倉崇禎七年武進士授雲南新平守備陞副將後從瞿式耜守廣西式耜殉難祖虞變姓名遁跡盤古山明年粵苗亂祖虞挺身出手格殺數百人中伏弩死

蔣若萊字龍江長洲人善騎射膂力絕人以事亡命居劉河十餘年流賊起巡撫張國維募致軍中以把總用守浦口崇禎八年賊至若萊往來奔截累立戰功擢參

王癸志稿

流寓

三

將明年賊犯江浦復大破之拜都督守安慶又破賊於潛山後守金華孤城援絕先焚其妻子巷戰經日力盡自刎死

吳胤侯字茂長休甯人寓太倉性任俠負經濟才嘗傾千金結客崇禎末上書督師史可法賓之禮賢館假職監紀軍務渡江督餉行五日揚州破胤侯欲馳回不得鷓冠芒屨旅食吳中爲文祭督師擬於西臺慟哭

熊開元字魚山嘉魚人天啟五年進士授崇明令調吳江以治行擢吏科給事中忤執政歸後補行人司司副復以言事受廷杖貶官杭州未至而都城陷開元薙髮

爲僧易名正志字槩庵隱跡靈巖已而居太倉潮音庵
士大夫多與之游有槩庵遺稿十卷

呂於韶字賡虞崇明歲貢生鼎革後寓州之十八都爲
鄉里校師預修崇明縣志時海氛將作於韶慮有變著
桑梓籌難紀順治十三年卒

國朝

王翬字石谷常熟人幼習畫王鑑至其地見翬所作山
水大奇之歸以語太常王時敏邀至西田別墅臨摹宋
元人名畫殆徧居久之畫法益工

楊晉字子鶴與王翬同里善畫山水人物每至太倉寓

壬癸志稿

流寓

四

居水雲亭踵門求畫者甚眾

余思復字不遠福建將樂人書法秀逸神似董文敏嘗
至太倉寓隆福寺流傳楮墨甚多

邵光龍字爾躍休甯人寓太倉甲申兵燹家貲蕩析光
龍奔走衣食卵翼弟姪遇故人貧困傾囊濟之子學易
繼父志口約腹裁率以濟人中年累金數百爲所親貸
不能償請以屋質學易惻然焚其券

杜登春字九高世籍青浦爲給事中張王治壻遂家太
倉順治八年拔貢以善書得議敘知廣昌縣在任十二
年有能聲旣歸與黃與堅唐孫華王吉武流連詩酒者

十年再補處州同知署宣平旋卒年七十七子昌丁字望之副貢生補教習亦善書以薦授浦城知縣陞永春州永春西境地窪多水患昌丁築壩禦衛爲永久利民德之稱杜公壩所泣號廉靜在任二十七年沒於官孫蕃錫醕質好學以監生充實錄館供事早卒

金樟字匡秀桐鄉籍居太倉康熙三十九年成進士考授中書改補行人陞工部主事居官廉慎勤敏尚書陳誥語人曰安得曹屬盡如金主事吾輩畫諾而已嗣以親老乞歸不復出年六十四卒曾孫錫鬯字秬和嘉慶十三年舉人仕至廣東嘉應知州有廉名子鶴清字翰

王癸志稿

流寓

五

皋道光二十五年一甲二名進士官編修早卒

鄭起泓字紀瀄崑山人族父伯昌得禁方精於醫戶外履滿遇有召輒遣起泓代往性絕敏於諸方書稍涉獵卽有神解遂臻勝妙嘗發篋得先人遺稿數十種皆梓以行避家難來太倉年六十二卒孫耀歲貢生有文譽傳源字星巖新安人僑居陸公市爲人磊落奇偉散千金結客家中落以筆耕自給紙窗竹屋吟嘯自如

蔣元益字希元長洲人乾隆十年進士由編修仕至兵部右侍郎致仕後主講婁東書院移家居焉卒年八十一孫鳳翽字瞻羽長洲諸生少孤嗜學屢應省試不售

嬰療疾卒

黃銓字清臣福建南安人祖煒適太倉遂家焉銓年十三隨祖客永春州祖歿歸養祖母及祖母歿重赴永春載祖槨歸葬以父母祔之生平好行義卒年七十六
倪爲賢字冠銓崇明人遷居太倉由乾隆丁酉拔貢朝考以知縣用分發湖南題補益陽縣調清泉丁憂服滿補直隸玉田縣陞遵化知州生平邃於學問尤工書與從弟爲炳齊名爲炳字彥彬舉乾隆四十五年順天鄉試授南皮知縣素工書法善詩文尚書鐵保亟賞其書總督兩江時建正誼書院延爲院長爲賢孫景曾有

壬癸志稿

流寓

六

傳

劉應鈞字鳴韶崑山籍家太倉性直而婉人樂與交善徵典朋座談議常隱數人雅擅詩文嘉慶十八年選貢入都公卿慕其才爭致之應京兆試闈藝出購鈔紙貴旋考補鑲紅旗教習病劇歸未幾卒

壬癸志稿十二終